

## 56. GNOMA denticollis.

Gn. elongata, teres, rufo-brunnea, antennis pedibusque ferrugineis; thorace elongato, in medio constricto, tuberculis 5 discoidalibus; elytris unispinosis, brunneis, fascia lata sinuata flavida.

Hab. in Brasilia, Dom. WESTIN. Mus. Holmiense.

Longit. 10 lin. — Valde affinis Gn. nodicollis; conformatio partium fere eadem, sed hæc species major, robustior; elytrorum pedumque color diversus, et thorax ante medium magis constrictus, tuberculis majoribus et acutioribus instructus. — *Antennæ* pallide ferrugineæ, corpore longiores, pilis tenuissimis parcius adpersæ, articulorum forma et proportionem omnino ut in Gn. nodicollis. *Caput* thorace latius, brunneum, nitidum, fronte brevi, retusa, ore obscuro; scrobs antennarum margine interiore spina brevi armatus. *Oculi* magni brunnei, profunde emarginati, sinu albo-sericeo. *Collum* subelongatum, conferte subtiliter punctulatum. *Thorax* quam latus plus duplo longior, basi apiceque truncatus, teres, ante basin parum, ante medium vero manifestius constrictus, rufo-brunneus, lævigatus, nitidus, impunctatus, tuberculis 5 discoidalibus; tribus videlicet anterioribus, quorum laterales majores spiniformes, intermedius minor obsoletior; posterioribus vero binis, remotioribus, minus elevatis. — *Scutellum* rotundatum, pube flavescente obductum. *Elytra* thorace multo latiora, basi truncata, lateribus rectis, apice paullo angustata spinaque apicali acuta armata, rufo-ferruginea, nitidissima; in medio fascia communis pallide flava, inæqualis et valde arcuata, suturam transgrediens, marginem quoque attingens sed intactum relinquens. — In singulo elytro series 3 vel 4 pilorum subtilissimorum erectorum. — *Corpus* subtus obscurius brunneum, nitidum, pube pallida depressa parcius adpersum. *Pedes* omnes rufo-ferruginei, femoribus anterioribus clavatis, posticis longioribus modice incrassatis, elytrorum apicem non attingentibus. *Alæ* albidæ, nervis ferrugineis.

## 57. DORCADION politum.

D. dorso subdepresso; atrum, nitidum, lineis longitudinalibus capitis thoracisque tribus, elytri singuli quatuor albis, sutura margineque niveis; pedibus ferrugineis, femoribus apice nigris.

Lam. polita BOEBER. — Hab. in Sibiria D. STEVEN. Mus. D. SCHOENHERR.

Magnitudo et fere forma D. morionis, sed magis depressum. *Caput* æquale, nigrum, nitidum, glabrum, macula frontali ad orbitas oculorum, lineisque verticis tribus, albis. *Os* nigrum palpis ferrugineis. *Antennæ* corpore breviores, nigrae, nitidæ, immaculatæ. *Thorax* niger, glaber, disco subtilius lateribus fortius punctulatus, linea dorsali, et utrinque laterali albis, lateribus rotundatis; spinula brevi armatus. *Scutellum* cordatum, album. *Elytra* basi rotundato-angustata, thorace longiora, dorso depressa, apice singulatim rotundata, atra, nitida, impunctata, sutura margineque niveis, lineisque in singulo 4 albis longitudinalibus, quarum prima suturam latam niveam sequens, secunda abbreviata, tertia ab humero usque ad apicem producta, quarta intra marginem niveum, non nisi colore ab illo distinguenda; hæ lineæ impressæ, interstitiis convexiusculis glabris, impunctatis. *Corpus* subtus nigrum, pube brevissima alba vestitum, ano rufescente. *Pedes* breves validi, ferruginei; tibiæ testaceo pubescentes; femora apice ultra medium nigra, anteriora incrassata, postica linearia, parum compressa. — Signaturæ omnes albæ e pube brevi depressa efficiuntur.

*Obs.* Hæc species olim sub nomine L. Glycyrrhizæ, nobiscum communicata, cui prima facie quidem similis, sed certe diversa. Lam. Glycyrrhizæ vera, (FABR. OLIV. PALLAS &c., confr. SCHOENH. Syn. Ins. III, p. 397. 201), non est nitida, sed tomento aterrimo vestita. *Antennarum* basis et pedes toti rufo-ferruginei, tarsis infuscatis. *Capitis* thoracisque pictura ut in D. polito, sed frons punctata, plerumque rufescens. *Elytra* lineas in singulo non nisi tres habent albas, quarum prima in ipsa sutura, tenuis, secunda ab humero ad apicem ducta, et tertia in ipso margine; inter mediam et suturalem præterea lineolæ interruptæ rudimentum.

## 58. LAMIA axillaris.

L. cyanea, nitida, albo pubescens; thorace subspinoso; elytris punctato-scabriusculis, humeris flavis.

Hab. in Brasilia, Dom. FROELICH. Mus. Holmiense.

Longitudo 4 lin. — *Antennæ* longitudine corporis, graciles, nigrae, subtus pilis longiusculis obsitæ. *Os* nigrum. *Corpus* ceterum laete cyaneum, nitidum, sed pube subtilissima alba vestitum, immixtis pilis fuscis paucioribus. *Caput* æquale, impunctatum. *Thorax* quam longus paullo latior, tuberculis minutis lateralibus, et duobus dorsalibus obsoletioribus, ceterum lævis. *Scutellum* breve, rotundatum, cyaneum. *Elytra* thorace manifeste latiora, illoque quadruplo longiora, apice rotundata, mutica, supra modice convexa, punctis seriatis subscabrata; humeri macula sat magna, laete flava, subtriangulari, notati. *Corpus* subtus cyaneum, albosericeum, pedibus gracilibus, muticis, concoloribus. *Alæ* fusca.

## 59. LAMIA saga.

L. cinerea, luteo albidoque varia, thorace brevi spinoso, fascia ferruginea; elytris cinereis, conferte albido-punctulatis, lævibus, punctis baseos elevatis nigris. ♂. ♀.

Hab. in Brasilia, Dom. CHRISTOFFERSON. Mus. Dom. SCHOENHERR.

Magnitudo Lam. Textoris, sed habitu et facie proxime affinis Lam. irroratæ FABR., capite thoraceque latis retractis a reliquis diversa. *Caput* magnum, retractum, fronte retusa quadrata, æquali, pallide ferrugineum, macula sub oculis nigra scabrosa, ore nigricante; in medio frontis verticisque lineola impressa longitudinalis. *Oculi* magni laterales, sublineares, superne ad antennarum insertionem emarginati. *Scrobis* antennalis angulus interior in mare productus, subspinosus, in femina non prominulus. *Antennæ* corporis longitudine, masculi longiores, simplices, cineræ. *Thorax* quam longus fere duplo latior, apice basique truncatus, parum sinuatus, lateribus spina valida nigra armatus, parum convexus, carinula media transversa lineisque impressis ante apicem et basin sculpturatus; cinereus, ante medium linea transversa pallide ferruginea. *Scutellum* semiovatum, cinereum. *Elytra* ad basin thorace multo latiora, et latitudine baseos plus duplo longiora, humeris subrectis prominulis, posterius sensim et parum angustata, apice rotundata, mutica, convexa, grisea, lævia, undique punctis vel guttulis albis conferte et inordinate conspersa; prope ipsam basin colore pallide-ferrugineo lineata, ibidemque punctis paucis elevatis nigris, nitidis adpersa. *Corpus* subtus pallide griseum, parum luteo varium, segmentorum marginibus lutescentibus, lineolaque pectoris laterali alba. *Pedes* breves simplices, corpori concolores, femoribus vix incrassatis.